

# Pers massiv commembers dapi 2000

## Pro Raetia – gè 2015 inqual problem e quità

■ **(anr/gc) La suprastanza da la Pro Raetia (PR) – sut il presidi da Johannes Flury, Aschera/Schiers – ha da sbatter cun inqual problem. Perquai han ins era fatg patratgs davart l'incarica da la PR en l'avegnir e vul s'adattar a la nova situaziun tras ina midada da statuts. L'engaschi da la PR per il bainstar dal Grischun resta dentant vinavant la finamira per propi.** Per ademplir ses duairs dovri adina novs projects. Grond quità fa dentant la sminuziun cuntinuanta dal dumber da commembers. L'onn passà è stà da registrar 47 extradadas – ord diversas raschuns – uschia ch'il dumber da commembers munta be anc a 486. Quai è passa la mesadad pli pauc ch'avon 15 onns. Alur aveva la PR anc pli che 1'000 commembers.

### **La giuventetgna na vul betg sa liar en uniuns**

Tar la radunanza da commembers da l'on passà a S. Gagl è vegni constatà che la PR saja generalmain memia pauc enconuschenta. Be ina occurrenza publica ad onn – numnadamain la Dieta champestra – saja bler memia pauc. Las uniuns grischunas en la Bassa – la PR sa considerescha sco lur uniun tetgala – sentian fitg il fatg che la ge-

neraziun giuvna na veglia betg sa liar en uniuns. La consequenza saja la veteranisaziun da talas, pia in aut dumber dals commembers vegls. Tar il Chor viril rumantsch da Lucerna saja il dumber da chantadurs sa reduci da 45 sin 10. Ma i dettia tuttina anc activas uniuns da Grischuns e Grischunas en la Bassa sco era novas e libras gruppaziuns da tempru grischuna.

### **Quint cun sperdita**

Las entradas da la PR 2015 muntan a 64'800 francs, las expensas denton a 68'400 francs, uschia ch'i dat ina sperdita da ca. 3'600 francs, quai che che sbassa la facultad sin 74'000 francs. La PR ha in fond da cultura. L'on passà ha ella survegnì 27 dumondas. La finala ha ella pudi sustegnair 16 projects (musica, cudeschs, teater e diversa).

### **Collavuraziun cun autras organisaziuns**

I dat pliras organisaziuns nua che la PR è sa participada, uschè er vid l'Institut cultural da perscrutaziun dal Grischun che ha edi 2015 en tut siat publicaziuns. – Era da la «Pro Lej da Segl» fa la PR part. Anc suenter 70 onns dapi la fundaziun datti adina pu-

spè discussiuns davart il mantegniment da la cuntrada dals lais en l'Engiadina, ch'è tant d'interess naziunal sco da muntada restanta per il turissem. – En la Chasa da cultura Rosengarten a Crusch (Grüsch) hai dà l'on passà duas exposiziuns.

### **Fundaziun Pro Vrin – co vinavant?**

Sco quai ch'il parsura da la Fundaziun Pro Vrin, *Aurelio Casanova*, scriva en il rapport annual da l'organisaziun, sa damondian ins – suenter la fusiun da la vischnanca da Vrin cun la vischnanca Lumnezia – co ch'i duess ir vinavant. Ma la Pro Vrin è tuttina sa fattschentada l'on passà cun divers projects.

Il project «Parc Adula» che vegn anc quest onn en votaziun è fitg disputaivel e quel dat actualmain blera discussiun a Vrin. In ulteriur project è la sanaziun da la chascharia vitta a Vrin. Suenter la sanaziun vulan ins magasinar là chaschiel d'alp, da chaura, far ulteriurs products ed endrizzar ina pitschna stizun per la vendita. – In terz project sa fa-tschenta cun la dumonda, co ch'ins pudess endrizzar bajetgs vids, plazzas da lavur e lavuratori. La Pro Vrin ha perquai laschà elavurar d'in expert in plan, co ch'ins pudess nizzegiar autramain quels stabiliments.